

#إسمعوا من المسيحيين متسمعوش عنهم (٢)

معندناش أربع أناجيل!

طبعًا السؤال الشائع هو:

عندكوا أربع أناجيل، مين فيهم الصّح؟

إتفقنا في البوست اللي فات إن الإنجيل هو خبر حلو ..

والخبر ده هو قصّة حياة وموت وقيامه الرب يسوع ..

وبالتالي معندناش أربع أناجيل ..

لأن الخبر الحلو واحد مش أربعة ..

لكن زي ما فيه قصص متكرّرة في كذا سورة ..

أو متقطّعة، وكل تفصييلة منها في سورة ..

فيه شويّة من تلاميذ (حواري) المسيح ..

كتبوا حياة المسيح بطريقة مشابهة ..

فالخبر نفسه (الإنجيل) واحد، لكن تفاصيله متنطورة ..

متّى كتب من زاوية، مرقس كتب من زاوية ..

لوقا كتب من زاوية، ويوحنا كتب من زاوية ..

مش كل دول تلاميذ المسيح مباشرة ..

متّى ويوحنا بس هما الجيل الأول من التلاميذ ..

ومرقس ولوقا هما تلاميذ تلاميذ المسيح (الجيل الثاني) ..

زي ما بتقول كده:

عن فلان رضي الله عنه قال: سمعت فلان قال ..

يعني عندنا أربع جوانب (شهادات) مختلفة، لإنجيل واحد ..

أربع حكايات مختلفة عن شخص واحد (عيسى) ..

الحكايات دي فيها تفاصيل متشابهة مع بعض ..

بس كمان فيها تفاصيل مختلفة عن بعض ..

زي شهادة شهود الإثبات في المحكمة، عن نفس القضية ..

عشان كده كمسيحيين بنسبي كتابات الأربع تلاميذ دول:

الإنجيل بحسب متّى، والإنجيل بحسب مرقس ..

الإنجيل بحسب لوقا، والإنجيل بحسب يوحنا.

يعني إجابة سؤال: عندكوا أربع أناجيل، مين فيهم الصّحّ؟
عندنا إنجيل واحد بس، بيحكى قصّة حياة عيسى ..
كتبه أربعة من تلاميذه (حواريه) من جوانب مختلفة ..
كلُّهم صّحّ، شبه بعض في حاجات، ومختلفين في حاجات.